

Ebazpena: R012/2024
Espedientea: E019/2018

Vitoria-Gasteiz, 2024ko otsailaren 26a.

Euskal Autonomia Erkidegoarekiko Ekonomia Itunaren Arbitraje Batzordea honako hauek osatzen dute: Violeta Ruiz Almendral presidenteak, eta Sofía Arana Landín eta Javier Muguruza Arrese bokalek. Bada, honako hau erabaki dute:

ERABAKIA

Bizkaiko Foru Aldundiak (aurrerantzean, BFA) gatazka planteatu du Ogasuneko eta Funtzio Publikoko Ministerioaren (aurrerantzean, OFPM) aurrean, SBPk (aurrerantzean, kontsultagilea) 2017ko maiatzaren 3an planteatutako zerga-kontsultari dagokionez. Gatazka hori Arbitraje Batzorde honetan izapidetzen ari da, 19/2018 espediente-zenbakiarekin.

I. AURREKARIAK

1.- Kontsultagileak Kanarietan zuen egoitza fiskala, eta 2016an bi merkataritza-lokal oinordetzan hartu zituen Bilbon, zeinak udalerrri horretan kokatutako bi enpresari errentan emanda baitzeuden.

Kontsultagileak jakin nahi zuen ea lokalen errentatzaile gisa erroldan alta eman behar zuen eta BEZaren autolikidazioak BFAn aurkeztu behar zituen, eta, kasu horretan, zer egin Estatuari ordaindu zitzaizkion 2016ko bigarren eta hirugarren hiru hilabetezko autolikidazioei zegokienez.

2.- BFAk erantzun-proposamena egin zuen. Euskadiko Zerga Koordinaziorako Organoak (aurrerantzean, EZKO) 2017ko abenduaren 21ean onartu zuen, eta OFPMri helarazi zion.

3.- OFPMk 2018ko martxoaren 2an jakinarazi zizkion oharrak EZKOri.

4.- EZKOk, 2018ko apirilaren 16ko bileran, OFPMren oharrak onartu zituen, BEZari buruzko 37/1992 Legea jotzeari buruzkoak izan ezik. Hala, BEZari buruzko 7/1994 Foru Arauarekin ordezkatzeari proposatu zuen, araudi aplikagarria delako.

5.- 2018ko maiatzaren 31n, OFPMk jakinarazi zuen ez zegoela ados EZKOren proposamenarekin, eta BEZaren Estatuko araudira jotzeko errepikatu zuen.

6.- Araugintza Koordinatu eta Ebaluatzeko Batzordeak (AKEB) ez zuenez erabakirik hartu, BFAk gatazka planteatu zion Arbitraje Batzordeari 2018ko ekainaren 1ean, eta 19/2018 espediente-zenbakiarekin izapidetu dugu.

7.- Ekonomia Itunaren 68.Bi artikuluan aipatzen den alegazio-izapidea eman ondoren, BFAk 2018ko irailaren 25ean egin zuen bere idazkia, eta EZKOren jarrera berretsi zuen. Bestalde, OFPMk alegazio-idazkia aurkeztu zuen 2018ko urriaren 1ean, eta bere jarrera berretsi zuen.

II. ZUZENBIDEKO OINARRIAK

1.- Arbitraje Batzordearen eskumena.

Arbitraje Batzordeak dauka eskumena gatazka hau ebazteko, Ekonomia Itunaren 64.b) artikulua haxe ezartzen baitu Araugintza Koordinatu eta Ebaluatzeko Batzordearen funtzioei dagokienez:

«Ekonomia-itun honetan aipatutako lotuneen aplikazioari buruz egiten zaizkion kontsultei erantzutea. Kontsultaren bat jasotzen denean, bi hilabeteko epean hura jaso denetik, kontsulta bera eta beraren ebazpen-proposamena gainerako administrazio interesdunei helaraziko zaizkie, azter ditzaten. Bi hilabetetan inork ez badu oharririk egiten ebazpen-proposamenari buruz, proposamena onetsizat joko da.

Oharririk badago eta horiek onartu ezean, horien gaineko akordioa lortu ahalko dute Araugintza Koordinatu eta Ebaluatzeko Batzordearen barruan. Nolanahi ere, aipatutako oharrak egin eta bi hilabetera ez bada akordiorik lortu, Araugintza Koordinatu eta Ebaluatzeko Batzordeak, baita ukitutako beste edozein administraziok ere, hilabete izango du desadostasuna Arbitraje Batzordera helarazteko».

Hala, Ekonomia Itunaren 68.Bi artikulua honako hau xedatzen du:

«Prozedura laburtua aplikatuko da ekonomia-itun honetako 64. artikuluko b) letrako eta 47 ter artikuluko Hiru apartatuko kasuetan.

Kasu horietan, auziak izapidetzeko hilabeteko epean onartu beharko ditu Arbitraje Batzordeak, aurkezten direnetik zenbatzen hasita; hamar eguneko epe komuna emango die ukitutako alderdi guztiei alegazioak egin ditzaten, eta epe hori bukatu eta hilabetean eman beharko du ebazpena».

2.- Administrazioen jarrerak

Bai EZKO eta bai OFPM ados daude egindako kontsultaren funtsezko alderdietan, baina ez datoz bat erabili beharreko BEZaren erreferentzia arauemailearekin (edo Bizkaikoa, edo Espainiakoa, edo, hala badagokio, biak).

3.- Arbitraje Batzordearen iritzia.

Administrazioen arteko bat-etortzeak nahikoak dira zergapekoari erantzun bat eskaini ahal izateko, zeinak beharrezko den segurtasun juridikoa emango baitio 2016ko zerga-betebeharrak betetzeko.

Hala, Espainiako araudiaren aipamenari buruzko desadostasunek, hura aplikagarria izango balitz, ez liokete SBP jaunari eskubidea kendu behar.

Arbitraje Batzordearen Erregelamenduko 8. artikulua 39/2015 Legea igortzen du modu osagarrian. Lege horren 88.1 artikuluan xedatzen da ebazpenen espedientetik eratorritako gai guztiak erabakiko direla, alderdiek berriaz planteatu dituzten ala ez kontuan hartu gabe.

Kontuan hartuta Ekonomia Itunaren 64.b) artikulua kontsulta bera ebazteko eskumena Arbitraje Batzordeari esleitzen diola, ez da inolako mugarik hauteman horrek esplizituki aipa ditzan foru-araudia eta Espainiako araudia. Beraz, ezin zaio aplikatu aipatzen den Araugintza Koordinatu eta Ebaluatzeko Batzordearen ustezko muga.

Ondorioz, zergapeko kontsultagileari ez zitzaion beharrezko zen segurtasun juridikoa kendu behar, funtsezkoa ez den desadostasun batengatik. Izan ere, ez du inolako zentzurik kontsulta ebazteko gaitasuna duen organoari, Arbitraje Batzordeari, ez zaiolako inolako mugarik aplikatzen, eta ezin delako berrezarri urte batzuk geroago.

Horiek horrela, Arbitraje Batzordeak

ERABAKITZEN DU

1.- Prozedura artxibatutzat deklaratzeari, bestelako izapiderik egin gabe, gerora bere xedea galdu duelako, zeina baita arrazoizko epean erantzun bat eman ahal izatea, kontsultagileari zerga-betebeharrak betetzeko segurtasun juridikoa emateko.

2.- Erabaki hau Ogasuneko eta Funtzio Publikoko Ministerioari, Zerga Administrazioeko Estatu Agentziari, Bizkaiko Foru Aldundiari, Euskadiko Zerga Koordinaziorako Organoari eta SBPri jakinaraztea.